

# Daniel

Sin duda, ningun buki profétiko ta mas interesante ku e buki di Daniel! Tantu e kapitulonon historiko komo esnan profétiko ta yen di maravianan sobrenatural!

Den nos Beibel, e buki di Daniel ta e último di e bukinan di profetanon mayó—e di 27 buki di e 39 bukinan den Tèstament Bieu. Ma den Beibel hebreo, Daniel ta forma parti di e bukinan historiko na fin di Tèstament Bieu. E ta e di 22 buki di e 24 buki. Esdras-Nehemias i Krónikanan so ta sigui despues.

Daniel ta úniko entre e profetanon pa vários motibu. 1) Daniel no a haña un yamada spesial pa ku e ministerio profétiko manera Isaias i Jeremias. 2) Daniel a mira vishonnan i soñonan i a interpretá nan, ma e no tabata un profeta “profeshonal”. Su trabou tabata den gobièrnu, no komo un predikador. Sinembargu e ta konsiderá un profeta pa motibu di su profesianan ekstraordinario. 3) Daniel a sirbi den palasio di diferente rei pagano. 4) Daniel a profetisá hopi tokante nashonnan pagano. 5) Buki di Daniel ta e úniko buki di Tèstament Bieu ku ta klasifiká totalmente komo literatura apokáriptiko. 6) Buki di Daniel ta un yabi klave pa interpretá tur otro buki bíbliko profétiko.

Ta importante pa studia e buki di Daniel pa diferente motibu: 1) E buki di Daniel lo rekordábo ku Dios ta soberano. 2) E buki di Daniel lo yudábo komprendé algo di Dios di Su Reino. 3) E buki di Daniel lo influensióbo bida dor di e ehèmpel di Daniel (e tabata un kreyente ehemplar). 4) E buki di Daniel ta e fundeshi pa bo por komprendé profesia den Beibel. 5) E buki di Daniel lo siñabo kon pa hasi e orashon (“Laga Bo reino bin”). Pa Daniel, profesia a bira un motibu pa orashon.

## I. TRASFONDO DI E BUKI

Ora Salomon a muri, a bin un kiebro entre e 12 tribu di Israel. Dies tribu a forma e reino di nort, konosí komo Israel, i dos tribu (Juda i Benjamin) a forma e reino di sùit, Juda.

Añanan despues (721 B.C), tempu ku Asiria tabata e super-potensia di mundu, nan a konkistá Israel i a plama su habitantenan (2 Reinan 17). Asiria a purba konkistá Juda tambe e tempu ei (2 Reinan 18-19) ma Dios a protehá nan i nan rei hustu, Ezekias.

Nabopolassar a bira rei di Babilonia na 626 B.C. Babilonia a deklará nan independensia di e impero di Asiria i a uni ku enemigunan di Asiria. Poko poko Asiria a pèrdè su poder. Na aña 609 B.C., Babilonia a bringa kontra Asiria. Ora Egipto tabata na kaminda pa bai yuda Asiria den e bataya ei, Josias, e bon rei di Juda, a ataká Egipto pa prevení Asiria di haña yudansa. Ma Josias a wòrdu matá den e bataya. Babilonia tòg a vense Asiria den e bataya desisivo apesar di e esfuersonan di Egipto pa yuda Asiria.

Yu di Josias, Joakaz, a bira rei di Juda. Ma despues di 3 luna, Egipto, pa saka sla, a kit'é di su trono (2 Rei 23:31-34) i a pone su ruman, Joakim, na su lugá.

Ora Nabopolassar a muri, su yu-komandante, Nabukodonosor, a bira rei na 605 B.C. El a tuma kontròl di tur e teritorio ku anteriormente a pertenesé na Asiria, inkluiendo Juda.

Pues, awor tabatin dos poder prinsipal: Babilonia na nort i Egipto parti suit. E pais di Juda tabata situá meimei di nan dos, i pues a haña nan den un situashon hopi prekario.

### **A. BABILONIA SU PROMÉ INVASHON DI JUDA (605 B.C.)**

Joakim (609-598 B.C.) a keda bou dominio di Egipto te ora Babilonia a derotá Egipto den un otro bataya na Karkemis na año 605 B.C. Nabukodonosor a sigui su atvanse den direkshon sùit i a yega Jerusalèm na año 605 B.C. Na e okashon ei, el a tuma tesoronan i rehén. Daniel i su amigunan tabata entre e rehénnan di Nabukodonosor (Daniel 1:1-6). Babilonia a permití Joakim pa sigui reina, ma ta parse ku nan a eksigí pa Juda paga nan un siertu suma regular.

### **B. BABILONIA SU DI DOS INVASHON DI JUDA (597 B.C.)**

Babilonia atrobe a bai guera kontra Egipto (na frontera mes di Egipto) na año 601 B.C. Tur dos ehersito a sufri pèrdida grandi. Ta parse ku rei Joakim a tuma esaki komo su oportunidat pa keda sin paga su enemigu debilitá. Pa un tempu Nabukodonosor a manda algun soldá so kontra Juda pa trata ku Joakim su rebelion: kaldeonan, sirionan, moabitanan, amonitanan (2 Reinan 24:2). Ma despues el a disidí ku e tin ku trata ku (entre otro) Juda ku man duru. El a bandoná Babilonia ku su ehersitonan na desèmber 598 B.C.

Esei tabata e mésun luna ku rei Joakim a fayesé na Jerusalèm. Joakin, yu di Joakim, a bira rei di Juda, na komienso di 597 B.C. Ehersitonan di Babilonia a yega Jerusalèm dia 15-16 di mart di e año ei. Joakin, realisando ku e no por resistí kontra Babilonia, a entregá despues di reina solamente tres luna. Nabukodonosor a bai ku e tesoronan di palasio i tèmpele i por lo ménos 10.000 prisionero. Joakin mes tabata un di e prisioneronan, huntu ku su mama, su esposanan, su ofisialnan, soldánan, artesonan, smetnan i tambe e profeta Ezekiel. Na lugá di Joakin, Nabukodonosor a hasi Zedekias, yu mas yòn di Josias, rei (2 Reinan 24:10-17).

### **C. BABILONIA SU DI TRES INVASHON DI JUDA (587-586 B.C.)**

Zedekias a reina 11 año. Tur e tempu ku e tabata reina, tabatin esfuersonan pa nashonnan uni forsa pa resistí kontu Babilonia. Porfin Juda, bou guia di Zedekias, a rebeldiá huntu ku otro nashonnan kontra Babilonia. Komo resultado, Babilonia a bolbe rondoná Jerusalèm na año 587 B.C. i a logra drenta i destruí e stat i e tèmpele na 586 B.C.

Pues, Nabukodonosor a invadí Juda tres biaha. I e relato di e buki di Daniel ta kuminsá ku e promé invashon di Nabukodonosor.

<b>INVASHON</b>	<b>FECHA B.C.</b>	<b>TEKSTO</b>	<b>EVENTO</b>
#1	605	Daniel 1:1-6	Durante reino di Joakim, Daniel kapturá
#2	597	2 Reinan 24:10-16	Rei Joakin hibá Babilonia, i profeta Ezekiel tambe
#3	587-586	2 Reinan 25; 2 Krónikanan 36; Jeremias 39,52	Jerusalèm i tèmpele destruí

Poko tempu despues ku reino di Nabukodonosor a kaba na año 562, e persianan a kuminsá forma nan mes impero, bou liderato di Siro e Grandi. E susesornan di Nabukodonosor tabata asina inefektivo ku ora Siro a konkistá e siudat di Babilonia na año 539, e tabata aseptá komo libertadó na lugá di konkistadó.

Un año despues di tuma poder di Impero di Babilonia, rei Siro a duna libertat na tur pueblo deportá for di nan pais. Entre otro, e hudiunan por a regresá i rekonstruí nan nashon.

## **II. OUTOR DI E BUKI**

E buki ta presentá Daniel komo su outor (7:2; 8:1; 9:2; 12:4). Bes tras bes Daniel a hasi uso di e palabra “mi” referiendo na su mes, prinsipalmente den kapitulonon 7-12. Nos sa mas di Jeremias i Daniel ku kualke otro profeta. Daniel a konta basta di su bida.

## **A. BIOGRAFIA DI DANIEL**

Na idioma hebreo Daniel ta DANIYYEL, nifikando Dios ta Hues (Prens) òf Dios ta mi Hues (Prens).

Nos no sa fecha di nasementu di Daniel. Ma mayoria estudiante di Beibel ta haña ku e lo a nase mas òf ménos na aña 621 B.C., durante tempu di e reformashonnan spiritual di rei Josias.

En kontraste di Isaias, Jeremias, i Ezekiel, nòmber di Daniel su tata ta desconosí. Ma probabelmente Daniel tabata famia di rei di Juda, maske no un famia serka. E echu ku el a wòrdu hibá na Babilonia komo rehén ta duna indikashon den e direkshon aki. Tabata Babilonia su pólisa pa deportá “e mihónan” i tren nan pa sirbi rei di Babilonia. Algun ta pensa ku Daniel lo tabata desendiente di Ezekias i ku e tabata kumplimentu di Isaias su profesia (2 Reinan 20:17-18; Isaias 39:7). E historiadó, Josefus, a afirmá ku tantu Daniel komo su tres amigu (Ananias, Misael, Azarias) tabata famia di rei Zedekias.

Ora nos ta mira bida di Daniel, kon komo un hóben di apenas 16 aña e tabatin konvikshonnan firme i a para pa Dios na un pais pagano, nos mester konkluí ku su mayornan lo tabata hende masha deboto na Señor. Maske nan a biba durante un tempu ku tur rònt di nan tabatin dekadensia spiritual, nan a lamta nan yunan pa sirbi Señor.

Si Daniel a nase na aña 621 B.C., e lo tabatin 16 aña ora el a wòrdu hibá Babilonia na aña 605 B.C. Ananias, Misael, i Azarias tambe a forma parti di e grupo ei (1:6).

E hóbennan ku rei a selektá pa tren nan pa dreña su servisio mester tabata bunita di aparenzia, inteligente i bon eduká (1:4). Nabukodonosor, den su esfuerso pa asimilá e hudiunan (i hóbennan di otro nashon tambe) den e kultura, religion, èts. di Babilonia, a kambia Daniel su nòmber pa Beltsasar. Beltsasar ta nifiká prens di Bèl, na onor di ún di e diosnan pagano di Babilonia (Isaias 46:1; Jeremias 50:2; 51:44). Ma Daniel i su amigunan tabata disididu pa keda fiel na Jehova Dios.

Daniel i su tres amigu hudiu a haña chèns pa promoshon na Babilonia. Ma nan no a lubidá e leinan di Dios. Ora nan a haña òrdu pa kome e mèsun kuminda ku rei ta kome, nan a pidi un dieta di berdura. Lo tabata un tentashon pa kome e kuminda sabroso di rei na lugá di berdura. Ma e kuminda lo a wòrdu sakrifisá na e diosnan di Babilonia i e karni lo tabata impuru. Dios tabata kontentu ku nan a tuma e pará aki i nan a graduá ku mas onor ku tur otro.

Nabukodonosor tabatin un soño ku el a lubidá. Daniel a kont'é e soño i interpret'é. Komo resultado, Daniel a haña un puesto mas haltu. Dios a risibí onor dor di su tres amigu ora nan a nenga bùig dilanti e imagen, i a wòrdu tirá den fòrnu di kandela ma no a kima. Dios tabata onrá ora Daniel a interpretá un otro soño pa rei Nabukodonosor (kapítulo 4). Durante reinado di Belsasar, Daniel a interpretá e skirbimentu na muraya tokante fin di su reino e anochi ei. Tempu ku Darío tabata manda, Daniel tabata un di e ofisialnan ku puesto mas haltu. Darío tabata plania promové mas ainda ora el a wòrdu tirá den kueba di leon. Ma atrobe Dios a skap'é.

Daniel a risibí un promoshon tras di otro den palasio di e reinan pagano ku el a sirbi pa motibu di su sabiduria, karakter, i e bendishon di Dios riba su bida. Nabukodonosor a hasi Daniel gobernante di provinsia di Babilonia i hefe di e sabionan (2:48). Belsasar a hasié di tres mandatario den su reino (5:29). I Darío a hasi Daniel promé minister (6:1-3). Daniel a mantené un bon testimonio den un reino pagano pa por lo ménos 75 aña!

Maske Daniel tabata un suidadano di Juda, despues di su kaptúra ta parse ku e nunca mas a regresá na Juda. Henter e buki ta duna indikashon ku el a keda na Babilonia. Den 10:1 e tabata banda di e Riu Tigris, lokalísá basta serka Babilonia. Su ministerio tabata pa ku paganonan na Babilonia, i hudiunan den eksilio.

No tin evidensia ku Daniel a haña un yamada spesial pa sirbi komo un profeta. No tin duda ku Dios a revelá algun di e profesionan mas asombroso na Daniel. Ma esei no ke men ku e tabatin puesto di profeta...un profeta profeshonal. Ma tòg Daniel a sirbi komo Dios Su profeta for di mas òf ménos aña 605 B.C. te por lo ménos te aña 536 B.C.

Jeremias a profetisá ku e kaptividat di e hudiunan lo dura 70 aña (Jeremias 25:8-14). E 70 aña a kuminsá tempu ku Daniel a wòrdu deportá (605 B.C. – 1:1) i a kaba na aña 536 B.C. (10:1 – “e di tres aña di Siro”). Daniel su bida ta ekstendé for di komienso di e 70 aña di eksilio te kompletashon di e periodo, ora e eksiliadonan hudiu a regresá na Jerusalèm pa inisiá konstrukshon di e tèmpe di nobo. Na kuminsamentu di buki di Daniel, e tabata un hóben. Na fin di buki, e ta un hòMBER di edat atvansá, probabelmente kasi 90 aña di edat. Pues, Daniel su ministerio (sirbiendo den palasio di diferente rei) a dura por lo ménos 70 aña—e mésun periodo di tempu ku hudiunan tabata den kaptividat.

Jeremias i Ezekiel tabata profetanan ku a biba e mésun era ku Daniel. Kisas e hóben Daniel a konosé Jeremias promé ku el a wòrdu hibá na Babilonia. Probabelmente Daniel a konosé Ezekiel. Maske nan no a biba den e mésun stat, nan no a biba leu for di otro.

Pues, durante bida di Daniel, Babilonia a kai bou di diferente poder. Pa di promé, e kaldeonan a manda riba e siudat, provinsia i impero di Babilonia. E reinan kaldeo durante Daniel su bida tabata Nabukodonosor ku a reina pa 34 aña, sigui pa reinado di dos aña (562-560 B.C.) di su yu Evil-merodak (Jeremias 52:31). Neriglissar—esposu di yu di Nabukodonosor—a bin na mando pa kuater aña, sigui pa su yu, Labashi-Marduk, ku a reina solamente kuater luna. Nabonidus a kita poder di e dinastia i a kuminsá reina na aña 556 B.C. El a hasi Belsasar rei huntu kun’è na e stat di Babilonia.

Na aña 539 B.C., Media-Persia a konkistá siudat di Babilonia i a kita poder di e kaldeonan. Siro, rei di Persia, a konkistá tantu e stat di Babilonia komo e impero (1:21; 6:28; 10:1). Arkeologia no a deskubrí ainda ken presis “Darío, e medo” (5:31; 6:1; 9:1) tabata. E lo mester tabata un persona ku Siro a apuntá. Algun estudiante di Beibel ta pensa ku Darío tabata tata òf welo di Siro, konosí komo Astyages. Ma otronan ta bou di impreshon ku e lo mester tabata Gobryas. Su identidat sinembargu simpelmente no ta konosí fuera di Beibel.

Fecha i sirkunstansianan di morto di Daniel ta totalmente desconosí.

## **B. PERSONA DI DANIEL**

Daniel ta un di e hòmbenan di Dios mas admirá den Beibel. Maske e tabatin su luchanan, Beibel ta menshoná ningun fayò den su bida. Alkontrario, nos por mira diferente kalidat den su bida:

### **1. Kurashi**

Daniel tabata un hòMBER di kurashi. For di e promé kapítulo, komo un hóben, el a demonstrá su kurashi. Ora Daniel i su amgiunan a konkluí ku nan no por kome e kuminda di rei, a eksigí basta kurashi pa pidi pa un otro menú. Den kapítulo dos, Daniel a tendé ku tur e sabionan lo wòrdu ehekutá. Na lugá di pidi pa misericòrdia, ku kurashi e hóben a hasi informashon i a ofresé su servisionan na rei. Ora Dios a duna Daniel un mensahe, e no a hala atras pa dun’è. El a reprendé reinan asta ora su bida tabata na peliger. Nabukodonosor sigur no tabata kontentu pa tendé ku e lo bira loko pa shete aña (kapítulo 4)...i e tabatin poder pa ehekutá ken ku e ke. Talbes e otro sabionan tabata sa ku e soño a pronostiká algu malu pa rei, ma nan tabatin miedu pa bis’è. Den kapítulo 5, Daniel a bisa Belsasar ku e lo pèrdè su reino. E rei aki tambe tabatin outoridat pa mata esun ku tribi duna un mensahe asina. I ora e tabatin mas òf ménos 80 aña, Daniel tabatin kurashi pa hasi orashon asta ora e tabata sa ku e probabelmente lo ser tirá den kueba di leon.

### **2. Kapas**

Sin duda Daniel tabata bon den su trabou. Por nota esaki den e promé kapítulo mes pasobra Daniel i su amgiunan tabata preferá riba tur e otronan ku a graduá huntu ku nan (1:20). Despues di interpretá e soño di Nabukodonosor, rei a hasi Daniel “gobernante di henter e

provinsia di Babilonia i hefe supremo di tur e sabionan di Babilonia” (2:48). Rei tambe a yam’ é “hefe di e magonan” (4:9). Su trabou lo a inkluí trabou atministrativo, abilidadat pa komuniká. Ta parse ku rei tabata masha satesfecho ku Daniel su trabou.

Kapítulo seis ta duna un indikashon mas kla di Daniel su abilidadat. Darío a apuntá 120 sátrapa riba henter e reino ku tres gobernadó riba nan. Daniel tabata un di e tres. I el a “distinguí su mes entre e gobernadónan i sátrapanan” di tal forma ku Darío “tabatin pensá pa nombr’ é riba henter e reino” (6:1-3). Sin duda Daniel a demonstrá hopi sabiduria den su trabou.

### 3. Konsiderashon

Un otro kalidat ku a destaká den bida di Daniel tabata ku el a tene kuenta ku otro hende. Ora rei Nabukodonosor a hasié gobernante di e provinsia di Babilonia, Daniel a kòrda riba su amigunan. “Riba petishon di Daniel rei a nombra Sadrak, Mesak i Abed-nego riba e atministrashon di e provinsia di Babilonia” (2:49). Tin ora hende ta lubidá nan amigunan ora nan mes ta risibí un òf otro onor. Ma Daniel no a hasi esei. I ora Daniel a interpretá rei su soño profetisando ku e lo bira loko pa shete aña, Daniel tabata preokupá pa rei i a deseá ku rei lo por evitá esaki. E tabatin konsiderashon pa otro hende, a papia ku taktika i kortesia.

### 4. Apresia

Ta parse ku Daniel tabata hopi apresia, asta entre esnan den outoridat riba dje. Esaki ta indiká ku Daniel a komport’ é di tal forma ku nan a apresia’ é. Aspenaz (1:3) tabatin un apresio spesial pa Daniel. Puébelmente Ariok, kapitan di rei Nabukodonosor su guardia (2:14) a duna Daniel un favor spesial. Ma si esei ta e kaso, tabata atrobe pasobra Daniel a papia i komportá su mes na un manera ku a duna hende apresio p’ é. Asta rei Nabukodonosor su palabranan den kapítulo 4 ta indiká un apresio spesial pa e hòmer di Dios. Darío nunca tabata ke ehikutá Daniel. El a hañ’ é obligá di tira Daniel den kueba di leon fuera di su mes boluntat. Ma e siguiente dia, “rei a lamta mainta tempran, ora dia tabata habri, i a bai purá na e kueba di leon” i a “grita ku bos tristu” (6:19-20) sperando ku e leonnan no a kome Daniel.

### 5. Spiritual

Daniel tabata un hòmer spiritual. Ora el a konta anto splika nifikashon di e soño di rei Nabukodonosor, e no a probechá di e oportunitat di haña fama pa su mes. El a laga rei sa bon kla ku tabata Dios ku a revelá esaki n’ é (2:27-30). Tambe por ripará di e evento aki ku Daniel a demonstrá fe remarkabel. Siendo un hóben, ora el a tende di rei su soño, el a deklará ku e lo revelá e soño i interpretá e soño pa rei. Anto Daniel i su amigunan a bai hasi orashon.

Kapítulo 6 ta kontené un otro storia ku ta muestra su bida spiritual. Sabiendo ku tabatin un lei nobo ku orashon dirigí na kualke dios tabata prohibí pa un periodo di trinta dia, e no a kambia su kustumber. Daniel por a evitá di wòrdu tirá den e kueba di leon dor di keda sin hasi orashon, òf hasi orashon skondí. Ma el a sigui habri su bentana i hasi orashon tres biaha pa dia, manera tabata su kustumber pa tur hende sa ku e no ta kambia su bida pa skapa e leonnan. Esaki tabata obediensia total na Dios.

E mésun storia ta demonstrá bon kla ku Daniel tabata un hòmer santu i rekto. Su enemigunan a buska pa haña un òf otro fayó den su bida. Sin duda nan a investigá su trabou na plaka chikitu. Nan a skudriña kada área di su bida. I nan a haña nada. Nan a arest’ é solamente pasobra el a hasi bon... orashon.

Ta remarkabel ku Daniel a sirbi den gobièrnu totalmente pagano pa sesenta òf setenta piku aña i tòg a mantené un testimonio tan puru i santu. Asta e profeta Ezekiel, ku a biba na mésun tempu ku Daniel, tabata impreshoná ku su santidat (Ezekiel 14:14-20; 28:3).

Daniel tabata un hòmer ku a hasi hopi orashon, un hòmer ku a biba serka Señor. E totalidat di Daniel su bida, kada desishon den e palasio pagano, tabata bañá den orashon. Bes tras bes orashon ta mensioná den e buki (2:17-23; 6:10; 9:3-17; 10).

Dios a ekspresá Su opinion kla tokante Daniel tres bes: “hòmer mashá stimá” (9:23; 10:11,19).

Di bèrdat, bida di Daniel—i henter e buki—ta siña hopi lès praktiko pa e kreyente awendia. Su bida ta un demonstrashon kla di un bida dediká na Señor. E buki ta revelá kon un

lus ta briya kla den e skuridat pagano. E ta mustra ku e kreyente por ta viktorioso apesar di pruebanan. Daniel ta siña nos tokante orashon i konfiansa den Dios. Konfeshon di piká tambe ta bin dilanti den e buki (kapítulo 9).

### C. LÓGRONAN DI DANIEL

Nos por dedusí ku Dios a usa Daniel entre otro pa kumpli ku tres meta.

1. Dor di Daniel, Dios a mantené Su onor den un pais pagano ku no a onr'E. E mentalidat e tempu ei tabata, e dios di un ehersito viktorioso ta e dios mas poderoso. E kaldeonan lo a pensa ku e diosnan di Babilonia tabata mas poderoso ku e Dios di e pueblo hudiu. Dor di Daniel, Dios a demonstrá ku esei no ta bèrdat.

E dos soñonan di Nabukodonosor ku solamente Daniel por a interpretá (kapítulon 2 i 4) a komuniká bon kla ku Dios ta reina supremo riba tur e nashonnan i reinan. Den kapítulon 3 i 6, Dios a demonstrá ku E ta mas poderoso, librando Daniel for di leonan i su tres amigunan for di kandela pasobra nan a nenga bùig dilanti e imagen. Ripará ku rei tambe a komprendé e echu aki: “Pesei mi ta saka un dekreto ku kualke pueblo, nashon òf lenga, ku papia algu ofensivo kontra e Dios di Sadrak, Mesak i Abed-nego, lo wòrdu kuartisá i nan kasnan lo wòrdu hasí un monton di sushi, pasobra no tin otro dios ku por libra di e manera aki” (3:29).

2. Dor di Daniel, Dios a yuda e pueblo hudiu ku tabata den koutiverio. Beibel no ta bisa esaki spesífikamente. Ma kasi sigur esaki tabata e kaso.

Daniel tabata entre e promé rehénan hudiu ku a wòrdu hibá Babilonia. El a yega na un puesto haltu den e reino dentro di poko aña. Pues ora e gran mayoria di hudiu katibu a wòrdu tresí na Babilonia algun aña despues, Daniel tabatin un puesto klave ku e por a yuda nan. Ta parse ku e kondishon di hudiunan na Babilonia tabata relativamente bon. E katibunan a gosa bastante libertat, bibando den nan mes kasnan (p.e. Ezekiel 8:1). Nan por a komuniká ku hende na Juda via karta (Jeremias 29:1,25). Dokumentonan ku arkeólogonan a deskubrí na Nippur ta indiká ku nan tabatin oportunitat pa haña bon trabou i hasi negoshi. Tambe nan a biba na un di e partinan mas fertile di Babilonia, serka e riu Kebar (Ezekiel 1:1,3; 3:15,23), un kanal ku a proveé awa pa kunukunan. Esakinan tabata bentahanan ku probabelmente nan lo no a gosa si no tabatin un persona ku por a influensí rei.

Daniel tambe lo a influensí e regreso di hudiunan na nan mes pais 70 aña despues. E tabata na bida ainda tempu ku nan a bolbe na aña 538-537 B.C. i tabatin un di e puestonan mas haltu den gobièrnu ku e tabatin durante henter su bida (6:1-3). Maske Daniel tabata di edat atvansá i maske tabatin un kambio kompleto di gobièrnu, tòg Dios a sòru ku tabatin un persona ku puesto haltu ku a influensí e desishon korekto. Pues, kasi sigur Daniel a influensí rei Siro pa saka su dekreto permitiendu hudiunan pa regresá na nan pais (2 Krónikanan 36:22-23).

3. Dor di Daniel, Dios a duna revelashonnan maraviyoso ku ta regardá futuro. Buki di Daniel ta kompará ku e buki di Revelashon den Tèstament Nobo ku su profesianan asombroso. Dios por a selektá un profeta “profeshonal” pa kompartí e profesianan aki. Ma El a skohe un atministrador di palasio, Daniel. Esaki sin duda ta demonstrá Dios Su apresio pa e hòmber aki.

### III. FECHA DI E BUKI

Daniel a duna un fecha spesífiko na komienso di su buki: “den e di tres aña di e reinado di Joakim, rei di Juda” (1:1). Pues e promé fecha segun kronologia tabata 605 B.C. Maske tin otro fecha despues den e buki (2:1; 7:1; 8:1; 9:1), e último fecha segun kronologia ta hañá den 10:1: “Den e di tres aña di Siro...” (aña 536 B.C.). Pues, fechanan den e teksto ta indiká ku e eventonan den e buki a tuma lugá entre aña 605 i 536 B.C.

Nota algun otro opservashon relashoná ku fecha di e buki. 1) Sin duda e buki di Daniel a wòrdu skirbí despues di buki di Ezekiel. Ezekiel a duna ningun indikashon di eksistensia di impero di Media-Persia. Ma buki di Daniel ta demonstrá esaki kla. 2) E teksto ta skirbí na dos idioma: hebreo i arameo. En general por bisa ku *promé* ku era di Daniel, hudiunan no a

komprendé arameo. *Despues* di era di Daniel, nan no a comprendé idioma hebreo. Tabata *durante* era di Daniel ku hudiunan a comprendé tur dos idioma. 3) E teksto arameo ta indiká ku palabranan di Persia e infiltrá e vokabulario arameo. Pues, esaki tambe ta un indikashon ku e buki probabelmente a wòrdu skirbí entre 537 i 500 B.C. 4) Tin poko duda ku e buki a wòrdu skirbí na stat di Babilonia. 5) Hudiunan lo a hiba e buki bèk na Jerusalèm huntu ku nan ora nan a regresá na nan pais.

Relashoná ku esaki, por tin pregunta kon e buki a wòrdu skirbí. Básikamente tin dos pusibilidadat: 1) Daniel mes a skirbi e teksto original fo'i komienso te fin un tempu entre 605 i 536 B.C. òf pusíbelmente poko aña despues di aña 536 B.C. Talbes Daniel a skirbi mas òf ménos na aña 530 B.C.—ora e lo tabatin kasi 90 aña. 2) Daniel a skirbi e diferente storia, relato, i profesia. Mas na fin di su bida, òf poko tempu despues di su morto—sigur dentro di 50 aña despues di su morto—e buki a wòrdu kompilá, pues entre 536 i 486 B.C. Sigur e buki tabata kompletá durante bida di Daniel (despues di aña 536 B.C.) òf poko aña despues—sigur dentro di 50 aña despues di Daniel su morto.

Ma no tur studiante di Beibel ta di akuerdo ku e konklushon aki. Teólogoanon ku no ta kere doktrina bíbliko a ataká buki di Daniel fuertemente. Maske nan atákenan ta lokura, ta bon pa nos ta na haltura di esaki

## **A. ATAKENAN KONTRA E BUKI DI DANIEL**

Loke ta remarkabel di e buki ta ku e ta papia kla tokante Babilonia, Media-Persia, Alexander e Grandi, Impero Romano, Antiokus Epifanes, tempu di binida di Mesias, èts. E echu ku tur esaki a wòrdu skirbí entre aña 605 i 536 B.C. ta nifiká ku mayoria parti di loke a wòrdu skirbí no a sosodé ainda. Kapítulo 11 spesífikamente ta un kapítulo ku ta papia kla kla tokante eventonan ku a sosodé durante e 400 aña promé ku Hesus a nase. Pues, e buki di Daniel ta kontené profesianan maraviyoso. E profesianan aki ta evidencia irefutabel ku e buki di Daniel ta inspirá pa Dios!

Ma no tur hende ta gusta esei. Un teoria popular tabata ku Daniel a wòrdu skirbí pa un outor desconosí durante e revolushon Makabeo (170 - 164 B.C.) ora Antiokus Epifanes tabata pèrsigu e hudiunan tan pisá. Segun nan, buki di Daniel a wòrdu skirbí pa enkurashá hudiunan pa keda fiel na Dios apesar di e krueldat di persekushon.

Ma si buki di Daniel a wòrdu skirbí e fecha ei—no 400 aña promé (605 - 536 B.C.)—anto e buki di Daniel no ta un buki milagroso. E ora ei, loke Daniel a skirbi no ta profesia, sino historia skirbí komo sifuera tabata profesia. Pues, pa bisa ku e buki a wòrdu skirbí na aña 165 B.C. ta komuniká ku outor di e buki a produsí un froude pa e por enkurashá e hudiunan ku tabata pèrsiguí dor di Antiokus Epifanes.

Básikamente teólogoanon liberal a ataká e buki riba tres punto prinsipal. Nan a ataká 1) su milagernan asombrante – p.e. librá di kandela, leonnan, èts.—pasobra nan no ta kere ku kos sobrenatural por sosodé 2) Nan tambe a ataká su profesianan spesífiko, tambe pasobra profesia kumplí ta algu sobrenatural. Notabel ta ku hopi di e profesianan a wòrdu kumplí durante e síglonon promé ku Kristo. 3) I nan a ataká e supuesto erornan den e buki.

## **B. EVIDENSIA DEMONSTRANDO KU E BUKI DI DANIEL TA OUTÉNTIKO**

Tin amplio evidencia ku e buki di Daniel ta genuino. Nota algun argumento ku ta muestra ku e buki no ta un froude. 1) Ezekiel a referí na Daniel. Nan a biba den e mèsun era, 593-571 B.C. (Ezekiel 14:14,20; 28:3). 2) Septuaginta, Tèstament Bieu tradusí na idioma griegu na mas òf ménos aña 250 B.C., a inkluí buki di Daniel. Kon anto e buki di Daniel por a wòrdu skirbí na aña 165 B.C.? Ya kaba hudiunan a aseptá buki di Daniel promé ku era di e Makabeonan. 3) Josefus, un historiadó (ku a biba di 37-100 A.D.) a skirbi ku Alexander e Grandi kier a kastiga e hudiu pa nan leadat na Darío. Ma e sumosaserdote, Jada, na aña 332 B.C. a top'è, guiando un proseshon i a kalma su rabia dor di must'é e profesia di Daniel ku un mandatario di Gresia lo konkistá Persia, un profesia di Alexander e Grandi mes! Alexander a keda asina impreshoná ku

na lugá di destruí Jerusalèm, el a dreña e stat i a adorá na e tèmpe. Pues, buki di Daniel tabata eksistí ya kaba na e fecha ei: 332 B.C. 4) Josefus tambe a laga sa ku hudiunan bibando na era di Hesus a asepta e buki di Daniel komo inspirá.

Nota algun otro argumento. 5) Tèstament Nobo ta referí na Daniel i su buki diferente biaha. Tin indikashon ku 2 Tesalonisensenan 2:1-12 ta referí na Daniel 7. Hebreonan 11:33-34 (“a sera boka di leonnan, a paga e poder di kandela”) sin duda ta hasi nos kòrda Daniel 6 i 3. E buki di Revelashon ta usa di palabranan i símbolonan for di buki di Daniel. Tèstament Nobo ta referi na tres karakteristika básiko di Daniel: su milagernan (Hebreonan 11:33-34), su profesianan (Mateo 24:15) i su doktrina (tokante angelnan) den Lukas 1:19,26. Si buki di Daniel ta un froude, anto Tèstament Nobo ta malamente kiboká i no por ta inspirá pa un Dios perfekto! 6) Hesus a mensioná Daniel i su buki. E mésun Hesus ku a yama e fariseonan “hipokrita” (Mateo 23:13,14,15,23,25,27,29) a yama Daniel un “profeta” den Mateo 24:15. Hesus lo mester a akusá Daniel tambe di hipokresia si el a skirbi su buki despues ku e eventonan históriko a sosodé anto a pretendé ku el a profetisá e eventonan aki. Ta probabel ku Hesus a sita Daniel tambe den Su diskurso den Mateo 24 na dos otro okashon: den 24:21 El a sita Daniel 12:1 i Hesus Su palabranan den Mateo 24:30 a sita Daniel 7:13. Ta notabel tambe ku den e diskurso aki, Hesus a sita solamente Daniel...ningun otro outor di Tèstament Bieu. Klaramente Hesus a asepta Daniel komo un persona históriko konfiabel. Si Hesus tabata sa ku Daniel no ta genuine ma no a bisa esei, anto Hesus tambe ta un gañadó! Ma Hesus a asepta Daniel komo un profeta bèrdadero. El a mensioná diferente siñansa di Daniel: “E abominashon di desolashon” (Daniel 9:27; 11:31; 12:11; Mateo 24:15; Marko 13:14). Na Su rat, Hesus a sita Daniel 7:13, “for di awor boso lo mira e Yu di Hende sintá na man drecha di e Todopoderoso, i biniendo riba e nubianan di shelu” (Mateo 26:64).

Un otro argumento konvensiente ta ku 7) arkeólogonan a demonstrá ku Beibel ta papia bèrdat. Tabatin vários echu bíbliko ku no a kuadra ku pensamentu sekular. Teólogonan liberal a insistí ku esei ta evidensia ku Daniel mester a kiboká. Por ehempel: Daniel 5 ta bisa ku Belsasar tabata rei di Babilonia i a wòrdu matá anochi di e fiesta—mésun anochi ku Babilonia a wòrdu kapturá. Historiadónan sekular a bisa ku e último rei di Babilonia tabata Nabonidus i ku Nabonidus no tabata presente ora Babilonia a wòrdu konkistá. Nan a bisa ku el a wòrdu kapturá i tratá ku kariño i a biba komo un suidadano privá despues. Sin duda esei ta un eror den Beibel ...nan a pensa.

Ma a bin resultá atrobe ku Beibel no ta kiboká. Sir Henry Rawlinson a deskubrí algun inskripshon ku a laga sa ku tabatin dos rei na Babilonia durante último parti di impero di Babilonia: un tata i su yu. E tata, Nabonidus, siendo na un stat fortifiká pafó di Babilonia a hasi su yu, Belsasar, rei di e siudat di Babilonia. Belsasar tabata matá ora e tabata defendé e stat; Nabonidus a keda na bida. Esaki asta ta klara Daniel 5:7,29, unda Belsasar a ofresé ku esun ku por interpretá e palabranan riba muraya lo bira e di tres mandatario den impero. Daniel a bira e di tres mandatario pasobra ya kaba tabatin dos promé kuné: Nabonidus i Belsasar.

#### **IV. LEKTORNAN DI E BUKI**

Pa ken Daniel a skirbi su buki? Sin duda Daniel a skirbi pa hudiunan, spesífikamente pa esnan ku tabata den eksilio na Babilonia. Su meta tabata pa mostra nan ku kaptividadat na un pais pagano i fe den un Dios bibu no ta algu kontradiktório. Su profesianan a laga sa ku hudiunan lo eksistí ketu bai den futuro. El a profetisá di e reino Mileño ku Dios lo establese.

Ma e buki no tabata skirbi solamente pa hudiunan den kaptividadat. E tabata skirbí pa tur hudiu di tur era. Sigur e destrukshon di Jerusalèm a lamta hopi pregunta serka hudiunan tokante nan futuro. E buki di Daniel ta demonstrá kla ku Dios no a benta Su pueblo un banda; ku ainda Dios tin un proposito prominente pa nan den futuro.

I Daniel tambe lo a skirbi pa paganonan. E echu ku a buki ta skirbí na dos idioma ta indiká ku e no ta dirigí pa hudiunan so. Ademas, ta notabel ku Daniel a profetisá pa tantu hudiunan komo paganonan. Hopi di su profesianan ta regardá nashonnan pagano!



Pues, nos por konkluí ku Daniel a skirbi pa hudiunan i parsialmente tambe pa paganonan—tur dos!

## V. PROPOSITO DI E BUKI

Juda a wòrdu konkistá i Jerusalèm destruí. Pueblo di Dios tabata kompletamente desapuntá i desanimá. Salmo 137 ta komuniká kon nan lo a sinti. Dios a bandoná nan? Kiko a pasa ku tur e promesanan di Dios?

Daniel a mostra ku Dios ta soberano riba e nashonnan di mundu. Maske Babilonia a vense Juda, nan ta solamente un hèrment ku Dios ta usa pa kastiga pueblo di Dios pa nan piká. Ma un dia nan tambe lo wòrdu kastigá pasobra di bèrdat Dios ta Esun ku ta manda. Dios a demonstrá Su poder sobrenatural dor di libra Daniel i su amigunan. Asta Nabukodonosor mester a rekonosé ku E ta soberano! Finalmente Dios lo establese un reino ku nunca lo wòrdu destruí!

E mensahe di Daniel ta nesesario pa nos awendia! Tin ora nos ta teme e reinonan di mundu i nan poder! Ma nos no mester pèrdè for di bista ku Dios tin kontrol; E ta soberano!

Algun proposito general pa e buki:

A. Pa mostra e superperiodidat di Jehova Dios riba e ídolonan pagano di Kaldea.

B. Pa mostra ku Dios ta universalmente soberano riba tur e reinonan di mundu. E buki ta revelá un kontraste entre e poder di Dios i poder mundial. Por ta bèrdat ku Babilonia ta manda riba e hudiunan na e momentu ei. Ma esei ta e kaso solamente pasobra Dios a usa Babilonia komo Su hèrmènt pa kastigá e hudiunan.

Den e buki, Daniel a uni profesia i historia huntu pa mostra ku Dios ta viktorioso riba idolatria, blasfemia, kapricho, i intoleransia di paganonan. Dos frase ta destaká den buki di Daniel: “tin un Dios den shelu” (2:18,19,28,37,44) i “e Haltisimo tin e dominio den e reino di hende” (4:32). Dios, e Dios di e kreyentenan, ta soberano riba e reinonan di mundu i asuntonan di hende. Dios por kita mandatarionan di nan trono. E por derotá e nashonnan mas fuerte i entregá nan na nan enemigunan. E bèrdatnan aki ta sumamente importante konsiderando e sirkumstansianan den kua e buki di Daniel a wòrdu skirbi.

Relashoná ku esaki, un teksto klave ta 3:17-18. “Ma si t’asina, nos Dios, Kende nos ta sirbi, por libra nos for di fòrnu di kandela kayente-kayente, i E lo libra nos for di bo man, O rei. Ma asta si E no hasi esei, sea sigur, O rei, ku nos no ta bai sirbi bo diosnan, ni adorá e imagen di oro ku bo a lamta.” Dios por skohe pa libra òf E por skohe pa keda sin libra. Ma Su soberania ta afektá di ningun manera si E no ta libra.

C. Pa mostra ku maske Babilonia tabata Dios Su hèrmènt pa kastigá Su pueblo, Dios lo kita Babilonia tambe for di e pantaya eventualmente. Dia lo yega ku nashonnan pagano lo pèrdè nan poder, pasobra Dios ta e Mandatario supremo! Bida di Daniel mes ta demonstrá ku nan poder ta limitá—Dios a skapa Daniel di leonnan, i su amigunan di e kandela, i asta Nabukodonosor ta hañ’è obligá pa rekonosé e poder superior di Dios!

D. Pa laga sa ki tempu Mesias lo bin. Kapítulo 9 ta indiká esaki kla kla.

E. Pa laga sa ku Dios lo establese Su reino permanente. E pueblo hudiu tabata antisipá ku nan lo haña nan libertat despues di 70 aña, manera Jeremias (25:8-14) a profetisá. Talbes nan a pensa ku e ora ei Dios lo establese Su reino inmediatamente ora e 70 aña di koutiverio ta kaba. Ma Daniel su vishonnan a laga sa ku kuater impero tin ku bin promé ku e reino di Dios na mundu lo ser establese. Tambe kapítulo 9 ta papia di 70 siman, na lugá di 70 aña—i e 70 siman ta referí na un periodo di 490 aña. Nò, e reino di Dios lo no wòrdu establese inmediatamente.

Dor di e síglonan di historia, por tin tempu ku por aparentá ku fin ta yega. E profesianan aki ta enkurashá e lektor pa no preokupá pa sa ki tempu e fin ta yega, ma pa keda deboto na Señor te fin.

F. Dia ta bin ku Dios lo establese un reino ku nunca lo wòrdu destruí, en kontraste di esnan humano ku eventualmente ta kaba na nada.

Dos echu ta destaká den e buki tokante e reino di Dios. 1) Tin un kontraste enorme entre imperonan humano i e reino di Dios, i 2) reino di Dios ta bin i lo dura pa semper.

G. Pa muestra ku maske pueblo di Dios lo sufri, konfiansa den e poder di Dios lo ta mas ku basta pa suprayá e difikultatnan, ilustrá ku e bida di Daniel mes.

## **VI. SKEMA DI E BUKI**

Ta masha bisto ku por parti e buki di Daniel den dos sekshon igual di seis kapítulo. Kapítulonon 1-6 ta prinsipalmente históriko. (Kapítulo 2 ta un eksepsion; siendo profétiko.) En kontraste, kapítulonon 7-12 ta prinsipalmente profétiko (ku eksepsion di un kapítulo históriko, kapítulo 10).

Nos tambe por notaku den kapítulonon 1-6, Daniel a interpretá soñonan di otronan. Den e último seis kapítulo, Daniel ta haña interpretashon pa su mes vishonnan.

- I. REVELASHONNAN DI E REI DI SHELU – 1-6
  - A. E Rei di Shelu ta Duna Konosementu - 1
  - B. E Rei di Shelu ta Revelá Misterionan - 2
  - C. E Rei di Shelu ta Libra Su Sirbidónan - 3
  - D. E Rei di Shelu ta Umiyá e Orguyoso - 4
  - E. E Rei di Shelu ta Huzga e Malbado - 5
  - F. E Rei di Shelu ta Hustifiká Su Sirbidó - 6
- II. VISHONNAN DI E REINO DI SHELU - 7-12
  - A. E Reino di Shelu i e Vishon di Kuater Bestia – 7
  - B. E Reino di Shelu i e Vishon di e Dos Chubatu – 8
  - C. E Reino di Shelu i Daniel Su Orashon di Konfeshon (70 siman) – 9
  - D. E Reino di Shelu i e Vishon Final di Futuro – 10-12

## **VII. OPSERVASHONNAN DI E BUKI**

Nota diferente punto di e buki:

### **A. IDIOMANAN DEN E BUKI DI DANIEL**

Buki di Daniel ta úniko entre e bukinan di Tèstament Bieu pa mas ku ún motibu. Un di e motibunan ta pasobra e ta kontené un sekshon basta largu skirbí na un otro idioma fuera di idioma hebreo. Un parti ta skirbi na idioma arameo, lenga di negoshi i lenga diplomátiko di e era ei. Nota e idiomaan den e tekstonan original: 1:1 - 2:4a ta skirbí na idioma hebreo. Esaki ta sigui pa e sekshon na idioma arameo: 2:4b - 7: 28. E buki ta konkluí (8:1 - 12:13) ku un sekshon na idioma hebreo atrobe.

Pakiko Daniel a hasi uso di dos idioma den su buki? E kontestá no ta konosí totalmente. Ma ta bisto ku Daniel a trata na un forma mas kompleto ku nashonnan pagano ku kualke otro profeta di Dios. Otro profeta a mensioná nashonnan pagano mientras nan a papia di e pueblo hudiu. Ma Daniel a duna historia (pasado i futuro) di nashonnan pagano.

Ku esaki en bista, ta notable ku den e sekshonnan hebreo, hudianan ta prominente i den sekshonnan arameo, paganonan ta destaká. Pues, idioma hebreo a wòrdu usá ora hudianan ta prominente i arameo tabata usá ora paganonan ta sobresalí i hudianan ta bin dilanti masha poko.

Durante añanan di eksilio, hudianan a usa idioma hebreo ménos pa kombersá. Idioma hebreo tabata desaparese, maske el a keda idioma di religion pa hudianan. Ma desde Israel a bira nashon na 1948, hebreo atrobe ta e idioma ofisial, maske e ta un forma moderno.

### **B. ÒRDU KRONOLÓGIKO DEN E BUKI DI DANIEL**

Na promé instante, e lesadó di buki di Daniel lo pensa ku e outor no a purba produsí un buki kronológiko. I por bisa ku e buki ta mas bien topikal na lugá di kronológiko, espesialmente den e último mitar di su buki. Ta parse ku e outor tabata ke pa e lektor mira e relashon entre e vishonnan i a organisá nan di e forma ei. Ma di otro banda, Daniel a sigui un òrdu kronológiko den su buki.

Klaramente kapítulonon 1-6 ta kronológiko. (I mester kòrda ku tin un lapso di tempu hopi grandi meimei di algun kapítulo.) Por bisa tambe ku kapítulonon 7-12 ta kronológiko. Fecha di e kapítulonon profétiko ta duna klaramente (7:1; 8:1; 9:1; 10:1). Kapítulo 7 i 8 tabata skirbí durante reinado di Belsasar. Darío tabata mandatarario den kapítulo 9 i Siro tabata rei den kapítulonon 10-12.

Pues, si nos ta pone e kapítulonon históriko i profétiko huntu, nos por yega na e siguiente òrdu: Kapítulonon 1-4 a sosodé durante reinado di Nabukodonosor. Kapítulonon 7 i 8 a wòrdu skirbí durante reinado di Belsasar i kapítulo 5 ta konta di klousura di su reinado. Darío tabata na mando den kapítulonon 6 i 9 i Siro tabata reina ora Daniel a skirbi kapítulonon 10-12.

### **C. TEMA PROGRESIVO DEN E BUKI DI DANIEL**

Ta interesante pa nota deterashon di aktitut kontra e Dios di Israel den e buki. Den e promé sinku kapítulo, en general e aktitut pa ku e Dios ta peorá. Prinsipalmente kapítulonon 3 (òrdu pa adorá e imagen) i 5 (hasiendo uso di kosnan sagrado) ta demonstrá esaki. Den kapítulo 6, Daniel ta tirá den kueba di leon pasobra e no ta despuesto pa stop di papia ku su Dios. Den e siguiente seis kapítulo, mas rei pagano ta purba prevení hudiunan di adorá nan Dios i ta hasi nan tèmpep i altar impuru.

Tambe ta interesante pa nota diferente par di kapítulo den e buki. Tantu kapítulonon 1 i 6 ta ilustrá e echu ku Daniel no tabata despuesto pa baha su stèndèrtan pa hende. Kapítulonon 2 i 7 ta trata ku kuater impero. Reinan ta pone nan mes na lugá di Dios den kapítulonon 3 i 8 i ta interumpí adorashon korekto. Tantu kapítulo 4 komo kapítulo 9 ta hasi uso di e number shete (4:23,25; 9:24-25). I kapítulonon 5 i 10-12 ta trata ku e tema di terminashon di reinonan.

### **D. PROFESIANAN DEN E BUKI DI DANIEL**

John Walvoord: “Entre tur e gran bukinan profétiko di Skritura, ningun ta duna un bista profétiko mas amplio i kronológiko di...historia ku e buki di Daniel. ...e buki di Daniel ta esensial pa ku e struktura di profesia i ta e yabi pa ku henter e revelashon profétiko di Tèstament Bieu... Un estudio di e buki aki ta...un investigashon preliminar indispensable pa kualke sistema eskatológiko kompleto.”

Daniel no ta un buki largu. Ma su páginanan ta kontenté profesianan fasinante i doktrinanan básiko ku ta pone e studiante di Beibel kibra kabes. E buki ta duna un deskripshon detayá tokante e destino di nashonnan pagano bou e man soberano di Dios.

Buki di Daniel ta un buki profétiko. Daniel a duna e fundeshi riba kua tur otro profesia den Beibel ta dependé. Por bisa spesífikamente ku Daniel 2 i 7 ta e wesu di lomba di profesia den Beibel. E dos kapítulonon (2 i 7) ta lista diferente impero, hasiendo uso di diferente símbolonan.

Kapítulo 9 ta importante pasobra e ta menshoná e profesia di 70 siman. Den e profesia aki, Dios a deklará ku E lo kumpli ku diferente kos den bida di nashon di Israel. Esakinan ta inkluí redenshon i restorashon di Israel. Dios lo hasi esaki a base di e krus di Kristo. Ma tempu ku e buki a wòrdu skirbí, e kumplimentu lo mester tuma lugá ainda.

Hopi studiante di Beibel ta yama Daniel “e buki di Revelashon di Tèstament Bieu”. Ma e buki di Revelashon lo ta inkomprensibel sin e buki di Daniel!

Siertu profesia a wòrdu kumplí kaba. Ma hopi di e profesianan lo no wòrdu kumplí te den futuro.

Nota algun punto relashoná ku profesia den e buki di Daniel.

#### **1. “Tempunan di e paganonan”**

Den Deuteronomio 28, Dios a ofresé Israel e pusibilidad di ta e nashon supremo na mundu si nan obedes’E. Ma e hudiunan no a obedesé Dios. Komo resultado El a duna e supremasia na e paganonan. Lukas 21:24 ta papia tokante “tempunan di e paganonan”. Esaki ta un periodo di tempu ku paganonan lo dominá na mundu.

Por bisa ku e tempu di paganonan a kuminsá ku e kaptividat di pueblo di Juda ku a kuminsá na aña 605 B.C. i lo dura te ora Kristo ta regresá i ta establese Su reino na mundu! Durante e tempu aki, e nashon hudiu no ta supreme entre nashonnan pagano.

## 2. Daniel 2 & 7

Den kapítulonon 2 i 7, por haña Nabukodonosor su soño i Daniel su vishon. Rei tabatin un soño tokante futuro podernan mundial (2). Mas òf ménos 50 aña despues, Daniel tabatin un vishon tokante e mésun podernan mundial (7). Kapítulo 7 ta duna mas informashon, p.e. e anti-kristo, Roma restorá i dividí den 10, èts.

Laga nos kompará e kontenido profétiko di e dos kapítulonon:

IMPERO	FECHA	DANIEL 2	DANIEL 7
Babilonia	605-539 B.C.	Kabes di oro – 2:36-38	Leon ku hala di águila – 7:4
Media-Persia	539-330 B.C.	Brasanan i pechu di plata – 2:39	Ber ku 3 repchi – 7:5
Gresia	330-150 B.C.	Bèlnan di brons – 2:39	Leopardo ku 4 kabes – 7:6
Roma	150 B.C. – ± 500 A.D.	Pianan di heru – 2:40	Bestia teribel – 7:7
Anti-Kristo	?	10 dede di pia di heru i klei – 2:41-43	Kachu chikitu – 7:8
Mesias	?	Piedra ku ta dal estatua – 2:44-45	Ansiano di Dianan – 7:9-14

Ta bon pa kòrda ku e impero romano nunca a wòrdu replasá pa un otro impero mundial. Pues, por bisa ku e ta kontinuá te e reino di e anti-kristo.

## 3. Daniel 8

Den e kapítulo aki, dos otro bestia ta presentá. Tur dos a representá imperonan ku lo aparesé den futuro (esta despues di Daniel su vishon). E karné chubatu tabata simbóliko di e impero di Media-Persia. Daniel tabata na bida ainda ora e impero aki a bin na poder na aña 539 B.C. E kabritu ku ún kachu a representá Gresia, spesífikamente Alexander e Grandi. E ún kachu a wòrdu remplasá pa kuater kachu. Un di nan a destaká den e vishon, un kachu chikitu. E kachu chikitu lo por referí na Antiokus Epifanes, mandatario di Siria despues di aña 175 B.C. ku a kousa hopi sufrimentu pa hudiunan. E tambe por referí na e anti-kristo ku tin ku bin ainda.

## 4. Daniel 9

Tin dos punto di bista general tokante e 70 siman haña den e kapítulo aki. Ambos grupo ta di akuerdo ku kada siman ta igualá shete aña. Pues, e 70 siman ta representá 490 aña. Un grupo ta haña ku e 70 siman a wòrdu kumplí den su totalidat den e promé siglo A.D. Segun e interpretashon aki e “prens” (9:26) ta Tito, komandante di e ehersitonan romano ku a destruí tèmpep i Jerusalèm na aña 70 A.D. Nan ta kere ku e persona menshoná solamente ku e palabra “e” den 9:27 ta Kristo, kende Su morto a kita e nesesidat pa sakrifisionan.

E di dos punto di bista ta ku e 70 siman lo no wòrdu kumplí den su totalidat te den e añanan di tribulashon. Den otro palabra, tin un pausa di síglonon meimei di siman 69 i siman 70. Ta yega na e konklushon aki entre otro pasobra siertu profesia listá den 9:24 no a wòrdu kumplí ainda.

Un kos remarkabel di e kapítulo aki ta ku e profesia aki ta duna e dia mes ku e Mesias (Hesus) a wòrdu rechasá pa su pueblo hudiu. Segun konteo di algun, Djadomingo di Rama ta e dia eksakto ku 483 aña (69 siman) a keda kumplí for di tempu “ku e òrdu a wòrdu duná pa restorá i rekonstruí Jerusalèm”.

## 5. Daniel 10-12

E tres kapítulonon aki ta ún solo vishon. Kapítulo 10 ta papia di e mensahero glorioso ku a trese e vishon pa Daniel i kapítulonon 11-12 ta presentá e vishon mes.

Hopi di kapítulo 11 ta papia di eventonan den futuro (pa Daniel, ma historia pa nos) ku ta konserní e 200 aña promé ku Hesus a nase na Bètlehèm, inkluiendo Antiokus Epifanes. Kapítulo 12 ta konserní e periodo di tribulashon ora e anti-kristo lo presentá.

E profesianan di Daniel ta maraviyoso. Daniel su bida tabata ehemplar. Nos mester ta kuidadoso pa no laga un estudio di profesia guia na spekulashon bano i teorinan absurdo. Profesia no mester guia na fanatismo òf senshonalismo. Alkontrario, profesia ta algu práktiko. E mester guia na un bida mas santu ku temor di Dios. Profesia den Beibel mester duna proposito den bida. Palabra di Dios ta bisa, “I kada un ku tin e speransa aki den djE ta purifiká su mes, meskos ku E ta puru” (1 Juan 3:3).

## Literatura Konsultá

- Archer, Gleason L. Jr., *A Survey of the Old Testament Introduction* (Chicago: Moody Press, 1985), p. 385-387.
- Baxter, J. Sidlow, *Explore the Book* (Grand Rapids: Zondervan Publishing House, 1960), vol. 4, p. 47-86.
- Benware, Paul N., *Survey of the Old Testament* (Chicago; Moody Press, 1988), p. 218-221.
- Demaray, Donald E., *A Layman's Guide to Our Bible* (Los Angeles: Cowman Publishing Company, 1964), p. 107-108.
- Douglas, Alban, *Old Testament Survey*, anotashon di lèsnan na Prairie Bible Institute (Three Hills, 1983), p. 82.
- Harrison, R.K., Merrill Tenney, ed. , *Zondervan Pictorial Encyclopedia of the Bible* (Grand Rapids: Zondervan Publishing House, 1976), vol. 2, p. 12-21.
- Hill, Andrew E. & Walton, John H., *A Survey of the Old Testament* (Grand Rapids: Zondervan Publishing House, 1991), p. 349-356.
- Jensen, Irving L., *Jensen's Survey of the Old Testament* (Chicago: Moody Bible Institute, 1978), p. 374-391.
- McGee, J. Vernon, *Thru the Bible* notes, p. 250-254.
- Mears, Henrietta C., *What the Bible is All About* (Minneapolis: World Wide Publications, 1966), p. 257-272.
- Miller, Adam W., *Brief Introduction to the Old Testament* (Anderson, Indiana, Warner Press, 1964), p. 211-214.
- Wiersbe, Warren W., *Expository Outlines on the Old Testament*, (Convington, Kentucky: Calvary Baptist Church, March 1973).
- Wood, Leon J., *The Prophets of Israel* (Grand Rapids: Baker Book House, 1979), p. 343-355.